

Kata Pengalo – Ngalo Ras Momo



Turang ras senina i bas Tuhanta Jesus Kristus, selaku serayan Tuhan, ikataken kami mejuah-juah ras Selamat Wari Minggu man banta kerina. Man bandu kekelengen kami si sekali enda denga erkebaktin i bas gerejanta enda, ikataken kami mejuah-juah. Kerehenndu nambahi keriahen man banta kerina. I bas bena kebaktinta mari dage sidengkehken momo kerna perdalanan perpulungen Tuhan bage pe rencana pelayanan gerejanta ku bas wari-wari si reh enda ([Ngogeken Momo](#)).

Kata Penaruh

=====

I bas minggu enda si bengketi minggu Advent si peteluken. I bas minggu enda kita iajuk guna ersikap nimai kerehen Raja si Mbelin, si maba kedamen ras si jadi Penebus man banta manusia. I bas minggu advent enda pe iajuk kita gelah banci nikapken dirinta guna ngalo-ngalo Raja si Mbelin e, eme ketubuhen Tuhanta Jesus Kristus. Kita arus ncidahken persikapenta subuk arah perukuren, pengerana ras perbahanenta i bas kegeluhenta. Jadi i bas minggu enda kita banci ndatken cara si payo guna ngalo-ngalo kerehen Tuhanta Jesus Kristus.

(3 lilin i bas 4 lilin si enggo sikap i bas inganna isagani)

Erkata Lonceng

(Perp. Tedis)

Rende

KEE No. 294 : 1, 2, 3

(Serayan Kebaktin Bengket ku Mimbar)

Kebaktin Minggu, 15 Desember 2024
Minggu Advent III/Ersikap Nimai Kerehen Tuhan

3	Votum – Salam <i>(Perp. Tedis)</i>
L	<p>Kebaktin enda lit i bas gelar Dibata Bapa si jadi ulu pengarapenta, i bas gelar Jesus Kristus si jadi Penampat man doni enda, ras i bas gelar Kesah Si Badia si tetap mpegegehi kita guna nikapken dalam man Tuhan.</p> <p>Perkuah ate ras dame i bas Dibata Bapa nari, i bas Tuhan Jesus Kristus nari ras i bas Kesah Si Badia. Amin</p>
P	Amin Amin Amin <i>(iendeken)</i>
4	Berita Kerna Perbahanen Ras Sura-Sura Dibata (Invocatio)
L	<p>“E maka nina malekat ndai man bana, “Ola kam mbiar, Maria, sabap enggo ibereken Dibata perkuah ateNa man bandu” (Lukas 1 : 30).</p> <p>Erpalasken Kata Dibata enda, sipuji IA alu ras kita ngendeken : KEE No. 424 : 1, 2</p>
5	Pujin Man Kemulian Dibata <i>(Perp. Kundul)</i>
L	Tuhan Dibata dem alu kemuliaan si meganjangna ibelang-belang doni enda.
P	Terpujilah Tuhan ibelang-belang doni enda.
L	Dibata si erkuasa nandangi kerina si lit i bas doni enda, Dibata si ngkuasai doni kerina.
P	Ipuji kami Kam Tuhan, erkiteken igejapken kami maka Kam kap Dibata si erkuasa nandangi doni enda ras isina kerina
L	Padan Dibata tetap kap tahan seh rasa lalap.
P	PadanNdu kap jadi gelemen i bas geluh kami Tuhan. Kam si man pujin dengen si isembah i bas kegeluhen kami.
L	Sipuji Tuhan alu ras kita rende arah : KEE No. 317 : 1, 2, 3

6	Kinata Kegeluhen Manusia i Bas Nimai Kerehen Dibata
<p>L</p> <p>L</p> <p>P</p> <p>L</p>	<p>Ibereken paksa man banta kentisik guna rukur kerna perukuren ras perbahanenta sedekah enda i bas la kita ersikap, la kita megenggeng, dengen la kita saber guna nimai kerehen Dibata e.</p> <p style="text-align: center;"><i>(Paksa Teneng)</i></p> <p>Dibata enggo erpadan reh ku doni enda guna encidahken kemuliaanNa man kita kerina manusia. KerehenNa e maba dame ras keselamatan man manusia. Kai dage si enggo ibahanndu i bas ngalo-ngalo kerehen Dibata e ?</p> <p>O Tuhan, Kam si maba dame kubas doni enda, ngaku kami maka kurang ersikap i bas ngalo-ngalo kerehenNdu e. Rusur kal kami la ngasup ngergaken kerehenNdu si maba dame dengen keselamatan man kami. La kami nikapken pusuh peraten dengen mekarus kami i bas ngalo-ngalo Kam. Ngaku kami, erkite-kiteken ngayak-ngayaki keriahen doni enda, piah dungna tading keriahen si ibabaNdu man kami. O Tuhan alemi min kami.</p> <p>Sisehken pingko-pingkonta man Dibata alu ngendeken : KEE No. 417 : 1, 2</p>
7	Padan Dibata Man Si Ngakuken Kinilatunggungenna <i>(Perp. Tedis)</i>
<p>L</p>	<p>Dibata dem i bas IA kekelengen, si tetap iberekenNa man kita manusia. Aminna pe kita la sikap ngalo-ngaloSa, tapi Tuhan tetap reh ndahi kita. Kata Dibata si jadi palas man banta guna ngalo-ngalo Tuhan, niNa :</p> <p><i>“Dage o senina-seninangku, saberlah kam ngayak reh Tuhan. Nehenlah sekalak perjuma kuga ia saber nimai seh jumana mereken ulih si erguna. Saber ia nimai udan si reh nandangi merdang ras udan si reh kenca rumpah page. Kam pe arus saber. Tetap min kam erpengarapen, sabap wari kerehen Tuhan seh me”</i>(Jakup 5 : 7 – 8).</p> <p>Meriah ukurta i bas kita enggo ngaloken padanNa, emaka rende kita : KEE No. 454 : 1, 2, 3</p>

8	Kata Dibata <i>(Perp. Kundul)</i>
a	<p>Marilah sibegiken Kata Dibata si man ogenken ibas Minggu enda sini ibuat ibas Kitab Jesaya 26 : 1 - 6. Mari siogeken secara pegancih. Sibenaken pengogenta ...</p> <p style="text-align: center;"><u>Ibereken Dibata kemenangen man bangsaNa</u></p> <p>26:1 L Reh me paksana maka bangsa e ngendeken ende-enden enda i negeri Juda: Nteguh kal kutanta enda; Dibata jine ngkawali tembok-tembokna!</p> <p>26:2 P Talangilah pintu gerbang kuta suruh bengket bangsa si setia, bangsa si tutus ngelakoken sura-sura Dibata.</p> <p>26:3 L O TUHAN, iberekenNdu kap dame si tuhu-tuhu man kalak si tetap ukurna, dengen si ernalem man baNdu.</p> <p>26:4 P Ernalemlah man TUHAN seh rasa lalap, tentu ikawaliNa kita tetap.</p> <p>26:5 L Enggo ipeterukNa kalak si rukur meganjang; icedakenNa kuta si nteguh inganna tading janah iperperkenNa tembokNa si meganjang.</p> <p>26:6 P Kalak si nai itindas genduari erdalan i babona, iperjakina alu nahena.</p>
	<p style="text-align: center;">Ketuahen kalak si megiken Kata Dibata, dengen si makekenca i bas geluhna si teptep wari, Maranatha.</p> <p style="text-align: center;">Ialoi perpulungen alu ngendeken :</p> <p style="text-align: center;"><i>Maranatha</i></p> <p style="text-align: center;"><i>Maranatha</i></p> <p style="text-align: center;"><i>Maranatha</i></p>

b	Ertoto guna Khotbah
c	Khotbah : Matius 25 : 1 - 13. Tema : “Ersikap Ngalo-ngalo Kerehen Tuhan”
d	Ertoto kenca khotbah
9	Pengakun Kiniteken <i>(Perp. Tedis)</i>
	<p>Aku tek man Dibata Bapa si la ersibar kuasaNa, si nepa langit ras doni.</p> <p>Aku tek man Yesus Kristus anakNa si Tonggal Tuhanta, si jadi arah Kesah si Badia, tubuh i dur singuda-nguda nari si so keliamen, tergelar si Maria, si ngenanami kiniseran sangana pemerintahen Pontius Pilatus, nipakuken ku kayu persilang, mate je nari ikuburken, nusur ku doni kematen, peteluwariken enggo keke ibas si mate nari, nangkih ku surga, perkundulna arah kemuhen Dibata Bapa si la ersibar KuasaNa, je nari reh me IA pagi ngeranaken si nggeluh ras si enggo mate.</p> <p>Aku tek man Kesah si Badia, janah lit sada Gereja si Badia, persadan kalak si Badia, pengalemi dosa, kinikeken kula, kegeluhen si rasa lalap.</p> <p>Amin.</p>
10	Persembahen <i>(Perp. Kundul)</i>
L	<p>Seh paksana man banta genduari nehken pengataken bujurta man Dibata. Kata Dibata si jadi palas man banta eme :</p> <p><i>“Ngataken bujur e me persembahen si pehagaken Aku janah si patuh ngikutken Aku tentu Kukelini” (Masmur 50 : 23).</i></p> <p>Iherta ngendesken persembahen rende kita ibas :</p> <p>KEE No. 289 : 1, 2, 3</p> <p>Pertoton Persembahen ras Syafaat</p>
11	Perpadanen Man Dibata <i>(Perp. Tedis)</i>
L	Dibata nikapken kinulin man manusia. Reh me IA ku doni enda guna maba anak-anakNa guna bengket kubas kemulianNa si rasa lalap. Emaka ersikaplah alu tutus !

P	Erpadan aku Tuhan, ertutus ate ndalanken sura-suraNdu, i bas ngalo-ngalo kerehenNdu.
L	Reh me Dibata peduakaliken, maba kegeluhenta kubaras kedamen si rasa lalap.
P	Erpadan aku Tuhan, tetap ngarapken kemalemen ate, si rehna i bas Kam nari. Janah nggit aku nikapken dalam kerehenNdu.
L	Guna peteguhi perpadanenta man Dibata, sipuji Tuhan alu rende : KEE No. 350 : 1, 2
12	Pertoton Tuhan
13	Pengutusen Ras Pasu-Pasu Dibata
L	Bengketilah ku bas kegeluhen si teptep wari alu dame ras mejuah-juah, beritakenlah kerehen anak Dibata man doni enda, janah alokenlah pasu-pasu idur Dibata nari : <i>“Dibata si mada perkuah ate, si enggo nenahken kam ku kemulianNa si rasa lalap i bas Jesus Kristus njadikan kam serta, tetap, megegeh dengen paguh. IA nge si mada kuasa seh rasa lalap” Amin.</i>
	Ialoi perpulungen alu ngendeken : <i>A..min</i> <i>A....min</i> <i>Amin</i>
	<i>SELAMAT HARI MINGGU/SYALOOM.....</i>